

唐 西天竺沙門 伽梵達摩 譯

大 廣 薩 菩 音 世 觀 眼 千 手 千  
經 尼 陀 羅 心 悲 大 礙 無 滿 圓

財團法人佛陀教育基金會 印贈

# 千手千眼觀世音菩薩廣大圓滿無礙大悲心陀羅尼經

唐 西天竺沙門 伽梵達摩 譯

如是我聞。一時。釋迦牟尼佛在補陀落迦山。觀世音宮殿。寶莊嚴道場中。坐寶師子座。其座純以無量雜摩尼寶。而用莊嚴。百寶幢幡。周匝懸列。爾時。如來於彼座上。將欲演說總持陀羅尼故。

與無央數菩薩摩訶薩俱。其名曰。總持王菩薩。寶王菩薩。藥王菩薩。藥上菩薩。觀世音菩薩。大勢至菩薩。華嚴菩薩。大莊嚴菩薩。寶藏菩薩。德藏菩薩。金剛藏

菩薩。虛空藏菩薩。彌勒菩薩。普賢菩薩。文殊師利菩薩。如是等菩薩摩訶薩。皆是灌頂大法王子。

又與無量無數大聲聞僧。皆行阿羅漢十地。摩訶迦葉。而爲上首。

又與無量梵摩羅天。善吒梵摩。而爲上首。

又與無量欲界諸天子俱。瞿婆伽天子。而爲上首。

又與無量護世四王俱。提頭賴吒。而爲上首。

又與無量天。龍。夜叉。乾闥婆。阿修羅。迦樓羅。緊那羅。摩睺羅伽。人。非人等俱。天德大龍王。而爲

上首。

又與無量欲界諸天女俱。童目天女。而爲上首。

又與無量虛空神。江海神。泉源神。河沼神。藥草神。樹林神。舍宅神。水神。火神。地神。風神。土神。山神。石神。宮殿等神。皆來集會。

時觀世音菩薩。於大會中密放神通。光明照曜。十方剎土及此三千大千世界。皆作金色。天宮。龍宮。諸尊神宮。皆悉震動。江河。大海。鐵圍山。須彌山。土山。黑山。亦皆大動。日。月。珠。火。星宿之光。皆悉不

現。

於是總持王菩薩。見此希有之相。怪未曾有。即從座起。叉手合掌。以偈問佛。如此神通之相。是誰所放。以偈問曰。

誰於今日成正覺。普放如是大光明。

十方剎土皆金色。三千世界亦復然。

誰於今日得自在。演放希有大神力。

無邊佛國皆震動。龍神宮殿悉不安。

今此大眾咸有疑。不測因緣是誰力。

為佛菩薩大聲聞。為梵魔天諸釋等。

唯願世尊大慈悲。說此神通所由以。

佛告總持王菩薩言。善男子。汝等當知。今此會中。有一菩薩摩訶薩。名曰。觀世音自在。從無量劫來。成就大慈大悲。善能修習無量陀羅尼門。為欲安樂諸眾生故。密放如是大神通力。

佛說是語已。爾時。觀世音菩薩。從座而起。整理衣服。向佛合掌。白佛言。世尊。我有大悲心陀羅尼呪。今當欲說。為諸眾生得安樂故。除一切病故。得壽命故。

得富饒故。滅除一切惡業。重罪故。離障難故。增長一切白法諸功德故。成就一切諸善根故。遠離一切諸怖畏故。速能滿足一切諸希求故。惟願世尊。慈悲聽許。

佛言。善男子。汝大慈悲。安樂衆生。欲說神呪。今正是時。宜應速說。如來隨喜。諸佛亦然。

觀世音菩薩重白佛言。

世尊。我念過去無量億劫。有佛出世。名曰。千光王靜住如來。彼佛世尊憐念我故。及爲一切諸衆生故。說此廣大圓滿無礙大悲心陀羅尼。以金色手摩我頂上作如

是言。善男子。汝當持此心呪。普爲未來惡世一切衆生。作大利樂。

我於是時。始住初地。一聞此呪故。超第八地。我時心歡喜故。即發誓言。若我當來。堪能利益。安樂一切衆生者。令我即時。身生千手。千眼具足。

發是願已。應時身上。千手千眼。悉皆具足。十方大地。六種震動。十方千佛。悉放光明。照觸我身。及照十方。無邊世界。

從是已後。復於無量佛所。無量會中。重更得聞。親

承受持。是陀羅尼。復生歡喜。踊躍無量。使得超越無數億劫微細生死。從是已來。常所誦持。未曾廢忘。由持此呪故。所生之處。恒在佛前。蓮華化生。不受胎藏之身。

若有比丘。比丘尼。優婆塞。優婆夷。童男。童女。欲誦持者。於諸衆生。起慈悲心。先當從我。發如是願。

南無大悲觀世音。願我速知一切法。

南無大悲觀世音。願我早得智慧眼。

南無大悲觀世音。願我速度一切眾。

南無大悲觀世音。願我早得善方便。

南無大悲觀世音。願我速乘般若船。

南無大悲觀世音。願我早得越苦海。

南無大悲觀世音。願我速得戒定道。

南無大悲觀世音。願我早登涅槃山。

南無大悲觀世音。願我速會無為舍。

南無大悲觀世音。願我早同法性身。

我若向刀山。刀山自摧折。

我若向火湯。火湯自消滅。

我若向地獄。地獄自枯竭。

我若向餓鬼。餓鬼自飽滿。

我若向修羅。惡心自調伏。

我若向畜生。自得多智慧。

發是願已。至心稱念。我之名字。亦應專念。我本師阿彌陀如來。然後即當誦此陀羅尼神呪。一宿誦滿五遍。除滅身中。百千萬億劫生死重罪。

觀世音菩薩復白佛言。世尊。若諸人天。誦持大悲章

句者。臨命終時。十方諸佛。皆來授手。欲生何等佛土。隨願皆得住生。

復白佛言。世尊。若諸衆生。誦持大悲神呪。墮三惡道者。我誓不成正覺。

誦持大悲神呪者。若不生諸佛國者。我誓不成正覺。

誦持大悲神呪者。若不得無量三昧辯才者。我誓不成正覺。

誦持大悲神呪者。於現在生中一切所求。若不果遂者。不得爲大悲心陀羅尼也。唯除不善。除不至誠。

若諸女人。厭賤女身。欲成男子身。誦持大悲陀羅尼章句。若不轉女身成男子身者。我誓不成正覺。生少疑心者。必不果遂也。

若諸衆生。侵損常住。飲食。財物。千佛出世。不通懺悔。縱懺亦不除滅。今誦大悲神呪。即得除滅。若侵損食用。常住飲食。財物。要對十方師懺謝。然始除滅。今誦大悲陀羅尼時。十方師即來。爲作證明。一切罪障。悉皆消滅。一切十惡。五逆。謗人。謗法。破齋。破戒。破塔。壞寺。偷僧祇物。污淨梵行。如是等一切惡業。

重罪。悉皆滅盡。唯除一事。於呪生疑者。乃至小罪輕業。亦不得滅。何況重罪。雖不即滅重罪。猶能遠作菩提之因。

復白佛言。世尊。若諸人天。誦持大悲心呪者。得十五種善生。不受十五種惡死也。其惡死者。

一者。不令其飢餓困苦死。

二者。不爲枷禁杖楚死。

三者。不爲怨家讐對死。

四者。不爲軍陣相殺死。



五者。不爲豺狼惡獸殘害死。

六者。不爲毒蛇虺蠍所中死。

七者。不爲水火焚漂死。

八者。不爲毒藥所中死。

九者。不爲蠱毒害死。

十者。不爲狂亂失念死。

十一者。不爲山樹崖岸墜落死。

十二者。不爲惡人厭魅死。

十三者。不爲邪神惡鬼得便死。

十四者。不爲惡病纏身死。

十五者。不爲非分自害死。

誦持大悲神呪者。不被如是十五種惡死也。得十五種善生者。

一者。所生之處。常逢善王。

二者。常生善國。

三者。常值好時。

四者。常逢善友。

五者。身根常得具足。

六者。道心純熟。

七者。不犯禁戒。

八者。所有眷屬。恩義和順。

九者。資具財食。常得豐足。

十者。恒得他人。恭敬扶接。

十一者。所有財寶。無他劫奪。

十二者。意欲所求。皆悉稱遂。

十三者。龍天善神。恒常擁衛。

十四者。所生之處。見佛聞法。

十五者。所聞正法。悟甚深義。

若有誦持大悲心陀羅尼者。得如是等十五種善生也。

一切天。人應常誦持。勿生懈怠。

觀世音菩薩說是語已。於眾會前。合掌正住。於諸眾  
生。起大悲心。開顏含笑。即說如是廣大圓滿無礙大悲  
心大陀羅尼神妙章句陀羅尼曰。

南無喝囉怛那哆囉夜哪<sup>一</sup> 南無阿唎哪<sup>二</sup> 婆盧羯帝爍鉢  
囉哪<sup>三</sup> 菩提薩跢婆哪<sup>四</sup> 摩訶薩跢婆哪<sup>五</sup> 摩訶迦盧尼迦哪<sup>六</sup>  
唵<sup>七</sup> 薩皤囉罰曳<sup>八</sup> 數怛那怛寫<sup>九</sup> 南無悉吉利埵伊蒙阿

唎<sup>十</sup> 哪<sup>十</sup> 婆盧吉帝室佛囉哪馱<sup>十一</sup> 婆<sup>十一</sup> 南無那囉謹墀<sup>十二</sup> 醯唎  
摩訶<sup>十三</sup> 播多沙<sup>十三</sup> 咩<sup>十三</sup> 薩婆阿他豆輸朋<sup>十四</sup> 阿逝孕<sup>十五</sup> 薩婆薩多  
那摩婆伽<sup>十六</sup> 摩罰特豆<sup>十七</sup> 怛姪他<sup>十八</sup> 唵阿婆盧<sup>十九</sup> 醯<sup>十九</sup> 盧迦帝  
<sup>二十</sup> 迦羅帝<sup>二二</sup> 夷醯唎<sup>二二</sup> 摩訶菩提薩埵<sup>二三</sup> 薩婆薩婆<sup>二四</sup> 摩羅  
摩羅<sup>二五</sup> 摩醯摩醯唎馱<sup>二六</sup> 孕<sup>二六</sup> 俱盧俱盧羯蒙<sup>二七</sup> 度盧度盧罰  
闍耶帝<sup>二八</sup> 摩訶罰闍耶帝<sup>二九</sup> 陀羅陀羅<sup>三十</sup> 地利尼<sup>三一</sup> 室佛囉  
嚩<sup>三二</sup> 遮羅遮羅<sup>三三</sup> 摩摩罰摩囉<sup>三四</sup> 穆帝嚩<sup>三五</sup> 伊醯移醯<sup>三六</sup> 室  
那室那<sup>三七</sup> 阿囉參佛囉舍利<sup>三八</sup> 罰沙罰參<sup>三九</sup> 佛羅舍耶<sup>四十</sup> 呼

嚩呼嚩摩囉<sup>四一</sup> 呼嚩呼嚩醯利<sup>四二</sup> 娑囉娑囉<sup>四三</sup> 悉利悉利<sup>四四</sup>  
蘇嚩蘇嚩<sup>四五</sup> 菩提夜菩提夜<sup>四六</sup> 菩馱夜菩馱夜<sup>四七</sup> 彌帝利夜  
<sup>四八</sup> 那囉謹墀<sup>四九</sup> 地唎瑟尼那<sup>五十</sup> 波夜摩那<sup>五一</sup> 娑婆訶<sup>五二</sup> 悉陀  
夜<sup>五三</sup> 娑婆訶<sup>五四</sup> 摩訶悉陀夜<sup>五五</sup> 娑婆訶<sup>五六</sup> 悉陀喻藝<sup>五七</sup> 室播  
囉耶<sup>五八</sup> 娑婆訶<sup>五九</sup> 那囉謹墀<sup>六十</sup> 娑婆訶<sup>六一</sup> 摩囉那囉<sup>六二</sup> 娑婆  
訶<sup>六三</sup> 悉囉僧阿穆佉耶<sup>六四</sup> 娑婆訶<sup>六五</sup> 娑婆摩訶阿悉陀夜<sup>六六</sup>  
娑婆訶<sup>六七</sup> 者吉囉阿悉陀夜<sup>六八</sup> 娑婆訶<sup>六九</sup> 波陀摩羯悉哆夜  
<sup>七十</sup> 娑婆訶<sup>七一</sup> 那囉謹墀播伽囉哪<sup>七二</sup> 娑婆訶<sup>七三</sup> 摩婆利勝羯

囉夜<sup>七四</sup>娑婆訶<sup>七五</sup>南無喝囉怛那哆囉夜耶<sup>七六</sup>南無阿唎哪  
<sup>七七</sup>婆嚧吉帝<sup>七八</sup>爍皞囉夜<sup>七九</sup>娑婆訶<sup>八十</sup>唵悉殿都曼哆囉鉢  
 馱耶<sup>八一</sup>娑婆訶<sup>八二</sup>

觀世音菩薩說此呪已。大地六變震動。天雨寶華。繽紛而下。十方諸佛悉皆歡喜。天魔外道恐怖毛豎。一切衆會皆獲果證。或得須陀洹果。或得斯陀含果。或得阿那含果。或得阿羅漢果者。或得一地。二地。三地。四地。五地。乃至十地者。無量衆生發菩提心。

爾時。大梵天王。從座而起。整理衣服。合掌恭敬。

白觀世音菩薩言。善哉。大士。我從昔來。經無量佛會。聞種種法。種種陀羅尼。未曾聞說。如此無礙大悲心。大悲陀羅尼神妙章句。唯願大士。爲我說此陀羅尼形貌狀相。我等大衆。願樂欲聞。

觀世音菩薩告梵王言。汝爲方便利益一切衆生故。作如是問。汝今善聽。吾爲汝等。略說少耳。

觀世音菩薩言。大慈悲心是。平等心是。無爲心是。無染著心是。空觀心是。恭敬心是。卑下心是。無雜亂心。無見取心是。無上菩提心是。當知如是等心。即是

陀羅尼相貌。汝當依此而修行之。

大梵王言。我等大眾。今始識此陀羅尼相貌。從今受持。不敢忘失。

觀世音言。若善男子。善女人。誦持此神呪者。發廣大菩提心。誓度一切衆生。身持齋戒。於諸衆生。起平等心。常誦此呪。莫令斷絕。住於淨室。澡浴清淨。著淨衣服。懸旛。然燈。香華。百味飲食。以用供養。制心一處。更莫異緣。如法誦持。

是時當有。日光菩薩。月光菩薩與無量神仙。來爲作

證。益其効驗。我時當以千眼照見。千手護持。從是以往。所有世間經書。悉能受持。一切外道法術。韋陀典籍。亦能通達。誦持此神呪者。世間八萬四千種病。悉皆治之。無不差者。亦能使令一切鬼神。降諸天魔。制諸外道。若在山野。誦經坐禪。有諸山精。雜魅。魍魎。鬼神。橫相惱亂。心不安定者。誦此呪一遍。是諸鬼神。悉皆被縛也。

若能如法誦持。於諸衆生。起慈悲心者。我時當勅一切善神。龍王。金剛密迹。常隨衛護。不離其側。如護

眼睛。如護己命。

說偈勅曰。

我遣密跡金剛士。烏芻君荼鷲俱尸。

八部力士賞迦羅。常當擁護受持者。

我遣摩醯那羅延。金剛羅陀迦毘羅。

常當擁護受持者。我遣婆馱娑樓羅。

滿善車鉢真陀羅。常當擁護受持者。

我遣薩遮摩和羅。鳩闌單吒半祇羅。

常當擁護受持者。我遣畢婆伽羅王。

應德毘多薩和羅。常當擁護受持者。

我遣梵摩三鉢羅。五部淨居炎摩羅。

常當擁護受持者。我遣釋王三十三。

大辯功德婆怛那。常當擁護受持者。

我遣提頭賴吒王。神母女等大力眾。

常當擁護受持者。我遣毘樓勒叉王。

毘樓博叉毘沙門。常當擁護受持者。

我遣金色孔雀王。二十八部大仙眾。  
常當擁護受持者。我遣摩尼跋陀羅。  
散支大將弗羅婆。常當擁護受持者。  
我遣難陀跋難陀。婆伽羅龍伊鉢羅。  
常當擁護受持者。我遣脩羅乾闥婆。  
迦樓緊那摩睺羅。常當擁護受持者。  
我遣水火雷電神。鳩槃荼王毘舍闍。  
常當擁護受持者。

是諸善神及神龍王。神母女等。各有五百眷屬。大力  
夜叉。常隨擁護。誦持大悲神呪者。其人若在空中。曠  
野。獨宿孤眠。是諸善神。番代宿衛。辟除災障。若在  
深山。迷失道路。誦此呪故。善神龍王。化作善人。示  
其正道。若在山林。曠野。乏少水火。龍王護故。化出  
水火。

觀世音菩薩復爲誦持者。說消除災禍。清涼之偈。

若行曠野山澤中。逢值虎狼諸惡獸。

蛇虺精魅魍魎鬼。聞誦此呪莫能害。

若行江湖滄海間。毒龍蛟龍摩竭獸。  
夜叉羅剎魚鼃鼃。聞誦此呪自藏隱。  
若逢軍陣賊圍繞。或被惡人奪財寶。  
至誠稱誦大悲呪。彼起慈心復道歸。  
若為王官收錄身。圜圉禁閉桎枷鎖。  
至誠稱誦大悲呪。官自開恩釋放還。  
若入野道蠱毒家。飲食有藥欲相害。  
至誠稱誦大悲呪。毒藥變成甘露漿。

女人臨難生產時。邪魔遮障苦難忍。  
至誠稱誦大悲呪。鬼神退散安樂生。  
惡龍疫鬼行毒氣。熱病侵陵命欲終。  
至心稱誦大悲呪。疫病消除壽命長。  
龍鬼流行諸毒腫。癰瘡膿血痛叵堪。  
至心稱誦大悲呪。三唾毒腫隨口消。  
眾生濁惡起不善。厭魅呪詛結怨讐。  
至心稱誦大悲呪。厭魅還著於本人。



惡生濁亂法滅時。婬欲火盛心迷倒。

棄背妻婿外貪染。晝夜邪思無暫停。

若能稱誦大悲呪。婬欲火滅邪心除。

我若廣讚呪功力。一劫稱揚無盡期。

爾時。觀世音菩薩。告梵天言。

誦此呪五遍。取五色線作索。呪二十一遍。結作二十一結繫項。

此陀羅尼。是過去九十九億恒河沙諸佛所說。彼等諸佛。爲諸行人。修行六度。未滿足者。速令滿足。故未

發菩提心者。速令發心故。若聲聞人。未證果者。速令證故。

若三千大千世界內。諸神仙人。未發無上菩提心者。令速發心故。若諸衆生。未得大乘信根者。以此陀羅尼威神力故。令其大乘種子。法芽增長。以我方便慈悲力故。令其所須。皆得成辦。

若三千大千世界。幽隱闇處。三塗衆生。聞我此呪。皆得離苦。有諸菩薩。未階初住者。速令得故。乃至令得十住地故。又令得到佛地故。自然成就三十二相。八

十隨形好。

若聲聞人。聞此陀羅尼。一經耳者。修行。書寫此陀羅尼者。以質直心。如法而住者。四沙門果。不求自得。

若三千大千世界內。山河。石壁。四大海水。能令涌沸。須彌山及鐵圍山。能令搖動又令碎如微塵。其中衆生。悉令發無上菩提心。

若諸衆生。現世求願者。於三七日。淨持齋戒。誦此陀羅尼。必果所願。從生死際。至生死際。一切惡業。並皆滅盡。三千大千世界內。一切諸佛。菩薩。梵。釋。

四天王。神仙。龍王。悉皆證知。

若諸人天。誦持此陀羅尼者。其人若在江河大海中沐浴。其中衆生。得此人浴身之水。霑著其身。一切惡業。重罪。悉皆消滅。即得轉生他方淨土。蓮華化生。不受胎身。濕卵之身。何況受持讀誦者。

若誦持者。行於道路。大風時來。吹此人身。毛髮。衣服。餘風下過。諸類衆生。得其人颺身風。吹著身者。一切重罪。惡業。並皆滅盡。更不受三惡道報。常生佛前。

當知受持者。福德果報。不可思議。誦持此陀羅尼者。口中所出言音。若善。若惡。一切天魔。外道。天龍。鬼神聞者。皆是清淨法音。皆於其人起恭敬心。尊重如佛。

誦持此陀羅尼者。當知其人。即是佛身藏。九十九億恒河沙諸佛所愛惜故。當知其人。即是光明藏。一切如來光明照故。當知其人。是慈悲藏。恒以陀羅尼救衆生故。當知其人。是妙法藏。普攝一切諸陀羅尼門故。當知其人。是禪定藏。百千三昧常現前故。當知其人。是

虛空藏。常以空慧觀衆生故。當知其人。是無畏藏。龍天善神常護持故。當知其人。是妙語藏。口中陀羅尼音無斷絕故。當知其人。是常住藏。三災惡劫不能壞故。當知其人。是解脫藏。天魔外道不能稽留故。當知其人。是藥王藏。常以陀羅尼療衆生病故。當知其人。是神通藏。遊諸佛國得自在故。其人功德讚不可盡。

善男子。若復有人。厭世間苦。求長生樂者。在閑淨處。清淨結界。呪衣著。若水。若食。若香。若藥。皆呪一百八遍。服。必得長命。

若能如法結界。依法受持。一切成就。其結界法者。取刀。呪二十一遍。劃地爲界。或取淨水。呪二十一遍。散著四方爲界。或取白芥子。呪二十一遍。擲著四方爲界。或以想到處爲界。或取淨灰。呪二十一遍爲界。或呪五色線二十一遍。圍繞四邊爲界。皆得。

若能如法受持。自然剋果。若聞此陀羅尼名字者。尙滅無量劫生死重罪。何況誦持者。若得此神呪誦者。當知其人。已曾供養無量諸佛。廣種善根。

若能爲諸衆生。拔其苦難。如法誦持者。當知其人。

即是具大悲者。成佛不久。所見衆生。皆悉爲誦。令彼耳聞。與作菩提因。是人功德。無量無邊。讚不可盡。

若能精誠用心。身持齋戒。爲一切衆生。懺悔先業之罪。亦自懺謝。無量劫來。種種惡業。口中駁駁。誦此陀羅尼。聲聲不絕者。四沙門果。此生即證。其利根有慧。觀方便者。十地果位。剋獲不難。何況世間小小福報。所有求願。無不果遂者也。

若欲使鬼者。取野鬻體淨洗。於千眼像前設壇場。以種種香華。飲食祭之。日日如是。七日必來現身。隨人

使令。

若欲使四天王者。呪檀香燒之。

由此菩薩大悲願力深重故。亦爲此陀羅尼威神廣大故。

佛告阿難。若有國土。災難起時。是土國王。若以正法治國。寬縱人物。不枉衆生。赦諸有過。七日七夜。身心精進。誦持如是大悲心陀羅尼神呪。令彼國土。一切災難。悉皆除滅。五穀豐登。萬姓安樂。

又若爲於他國怨敵。數來侵擾。百姓不安。大臣謀叛。疫氣流行。水旱不調。日月失度。如是種種災難起時。

當造千眼大悲心像。面向西方。以種種香華。幢幡。寶蓋。或百味飲食。至心供養。其王又能七日七夜。身心精進。誦持如是陀羅尼神妙章句。外國怨敵。即自降伏。各還政治。不相擾惱。國土通同。慈心相向。王子百官。皆行忠赤。妃后嫔女。孝敬向王。諸龍鬼神。擁護其國。雨澤順時。果實豐饒。人民歡樂。

又若家內。遇大惡病。百怪競起。鬼神邪魔。耗亂其家。惡人橫造口舌。以相謀害。室家大小內外不和者。當向千眼大悲像前。設其壇場。至心念觀世音菩薩。誦

此陀羅尼。滿其千遍。如上惡事。悉皆消滅。永得安隱。

阿難白佛言。世尊。此呪名何。云何受持。

佛告阿難。如是神呪有種種名。一名廣大圓滿。一名無礙大悲。一名救苦陀羅尼。一名延壽陀羅尼。一名滅惡趣陀羅尼。一名破惡業障陀羅尼。一名滿願陀羅尼。一名隨心自在陀羅尼。一名速超上地陀羅尼。如是受持。

阿難白佛言。世尊。此菩薩摩訶薩。名字何等。善能宣說如是陀羅尼。

佛言。此菩薩名。觀世音自在。亦名。撚索。亦名。

千光眼。

善男子。此觀世音菩薩。不可思議威神之力。已於過去無量劫中。已作佛竟。號。正法明如來。大悲願力。爲欲發起一切菩薩。安樂成熟諸衆生故。現作菩薩。

汝等大衆。諸菩薩摩訶薩。梵。釋。龍。神。皆應恭敬。莫生輕慢。一切人天。常須供養。專稱名號。得無量福。滅無量罪。命終往生阿彌陀佛國。

佛告阿難。此觀世音菩薩。所說神呪。真實不虛。若欲請此菩薩來。呪拙具羅香<sup>拙具羅香。安息香也</sup>。三七遍。燒。菩

薩即來。

若有貓兒所著者。取明哩吒那<sup>死貓兒頭骨也</sup>燒作灰。和淨土泥。捻作貓兒形。於千眼像前。呪鑢鐵刀子一百八遍。段段割之。亦一百八段。遍遍一呪。一稱彼名。即永差不著。

若爲蠱毒所害者。取藥劫布羅<sup>龍腦香也</sup>。和拙具羅香。各等分。以井華水一升和煎。取一升。於千眼像前。呪一百八遍。服。即差。

若爲惡蛇蠍所螫者。取乾薑末。呪一七遍。著瘡中。

立即除差。

若爲惡怨橫相謀害者。取淨土。或麵。或蠟。捻作本形。於千眼像前。呪鑢鐵刀一百八遍。一呪一截。一稱彼名。燒盡一百八段。彼即歡喜。終身厚重。相愛敬。

若有患眼睛壞者。若青盲眼暗者。若白暈。赤膜。無光明者。取訶梨勒果。菴摩勒果。鞞醯勒果。三種各一顆。擣破細研。當研時。唯須護淨。莫使新產婦人及猪。狗見。口中念佛。以白蜜。若人乳汁。和封眼中。著其人乳。要須男孩子母乳。女母乳不成。其藥和竟。還須

千眼像前。呪一千八遍。著眼中。滿七日。在深室慎風。眼睛還生。青盲。白暈者。光奇盛也。

若患瘡病著者。取虎。豹。豺。狼皮。呪三七遍。披著身上。即差。師子皮最上。若被蛇螫。取被螫人結臍。呪三七遍。著瘡中。即差。

若患惡瘡。入心悶絕欲死者。取桃膠一顆。大小亦如桃顆。清水一升和煎。取半升。呪七遍。頓服盡。即差。其藥莫使婦人煎。

若患傳屍鬼氣。伏屍連病者。取拙具羅香。呪三七遍。

燒熏鼻孔中。又取七丸如兔糞。呪三七遍。吞。即差。慎酒肉五辛及惡罵。若取摩那屎羅雄黃是也。和白芥子印成鹽。呪三七遍。於病兒床下燒。其作病兒。即魔掣迸走。不敢住也。

若患耳聾者。呪胡麻油。著耳中。即差。

若患一邊偏風。耳鼻不通。手脚不隨者。取胡麻油。煎青木香。呪三七遍。摩拭身上。永得除差。又方取純牛酥。呪三七遍。摩。亦差。

若患難產者。取胡麻油。呪三七遍。摩產婦臍中及玉



門中。即易生。

若婦人懷妊。子死腹中。取阿波末利伽草<sup>牛膝草也</sup>一大兩。清水二升和煎。取一升。呪三七遍。服。即出。一無苦痛。胎衣不出者。亦服此藥。即差。

若卒患心痛不可忍者。名。遁屍疰。取君杜魯香<sup>薰陸香</sup>乳頭成者一顆。呪三七遍。口中嚼咽。不限多少。令變吐。即差。慎五辛。酒肉。

若被火燒瘡。取熱瞿摩夷<sup>鳥牛屎也</sup>。呪三七遍。塗瘡上。即差。

若患蛔蟲齧心。取骨魯末遮<sup>白馬屎也</sup>半升。呪三七遍。服。即差。重者一升。蟲如縲索出來。

若患丁瘡者。取凌鎖葉擣取汁。呪三七遍。漉著瘡上。即拔根出。立差。

若患蠅螫眼中。骨魯怛佉<sup>新驢屎也</sup>濾取汁。呪三七遍。夜臥著眼中。即差。

若患腹中痛。和井華水。和印成鹽三七顆。呪三七遍。服半升。即差。

若患赤眼者。及眼中有努肉及有翳者。取奢奢彌葉<sup>苟杞</sup>

葉也。擣濾取汁。呪三七遍。浸青錢一宿。更呪七遍。著眼中。即差。

若患畏夜。不安恐怖。出入驚怕者。取白線作索。呪三七遍。作二十一結。繫項。恐怖即除。非但除怖。亦得滅罪。

若家內橫起災難者。取石榴枝。寸截一千八段。兩頭塗酥酪蜜。一呪一燒。盡千八遍。一切災難悉皆除滅。要在佛前作之。

若取白菖蒲。呪三七遍。繫著右臂上。一切鬪處。論

義處。皆得勝他。

若取奢奢彌葉枝柯。寸截。兩頭塗真牛酥。白蜜牛酥。一呪一燒。盡一千八段。日別三時。時別一千八遍。滿七日。呪師自悟通智也。

若欲降伏大力鬼神者。取阿喇瑟迦柴木患子也。呪七七遍。火中燒。還須塗酥酪蜜。要須於大悲心像前作之。若取胡噯遮那牛黃是也一大兩。著瑠璃瓶中。置大悲心像前。呪一百八遍。塗身。點額。一切天。龍。鬼。神。人及非人。皆悉歡喜也。

若有身被枷鎖者。取白鴿糞。呪一百八遍。塗於手上。用摩枷鎖。枷鎖自脫也。

若有夫婦不和。狀如水火者。取鴛鴦尾。於大悲心像前。呪一千八遍。帶。彼即終身歡喜相愛敬。

若有被蟲食田苗及五果子者。取淨灰。淨沙或淨水。呪三七遍。散田苗四邊。蟲即退散也。果樹兼呪水灑者。樹上蟲不敢食果也。

佛告阿難。若爲富饒。種種珍寶資具者。當於如意珠手。若爲種種不安求安隱者。當於羈索手。若爲腹中諸

病。當於寶鉢手。若爲降伏一切魍魎鬼神者。當於寶劍手。若爲降伏一切天魔神者。當於跋折羅手。若爲摧伏一切怨敵者。當於金剛杵手。若爲一切處怖畏不安者。當於施無畏手。若爲眼闇無光明者。當於日精摩尼手。若爲熱毒病求清涼者。當於月精摩尼手。若爲榮官益職者。當於寶弓手。若爲諸善朋友早相逢者。當於寶箭手。若爲身上種種病者。當於楊枝手。若爲除身上惡障難者。當於白拂手。若爲一切善和眷屬者。當於胡瓶手。若爲辟除一切虎狼豺豹諸惡獸者。當於旁牌手。若爲一切時

處好離官難者。當於斧鉞手。若爲男女僕使者。當於玉環手。若爲種種功德者。當於白蓮華手。若爲欲得往生十方淨土者。當於青蓮華手。若爲大智慧者。當於寶鏡手。若爲面見十方一切諸佛者。當於紫蓮華手。若爲地中伏藏者。當於寶篋手。若爲仙道者。當於五色雲手。若爲生梵天者。當於軍遲手。若爲往生諸天宮者。當於紅蓮華手。若爲辟除他方逆賊者。當於寶戟手。若爲召呼一切諸天善神者。當於寶螺手。若爲使令一切鬼神者。當於鬘腰杖手。若爲十方諸佛速來授手者。當於數珠手。

若爲成就一切上妙梵音聲者。當於寶鐸手。若爲口業辭辯巧妙者。當於寶印手。若爲善神龍王常來擁護者。當於俱尸鐵鉤手。若爲慈悲覆護一切衆生者。當於錫杖手。若爲一切衆生常相恭敬愛念者。當於合掌手。若爲生生之衆不離諸佛邊者。當於化佛手。若爲生生世世常在佛宮殿中。不處胎藏中受身者。當於化宮殿手。若爲多聞廣學者。當於寶經手。若爲從今身至佛身。菩提心常不退轉者。當於不退金輪手。若爲十方諸佛速來摩頂授記者。當於頂上化佛手。若爲果蓏諸穀稼者。當於蒲萄手。

如是可求之法。有其千條。今粗略說少耳。

日光菩薩爲受持大悲心陀羅尼者。說大神呪。而擁護之。

南無勃陀瞿<sup>上聲</sup>那<sup>上聲</sup>迷<sup>二</sup>南無達摩莫訶低<sup>二</sup>南無僧伽多  
夜泥<sup>三</sup>底<sup>下以切</sup>哩部畢薩<sup>僧沒切</sup>咄<sup>登沒切</sup>檐納摩

誦此呪。滅一切罪。亦能辟魔及除天災。

若誦一遍。禮佛一拜。如是日別三時。誦呪禮佛。未來之世。所受身處。當得一一相貌端正。可喜果報。

月光菩薩亦復爲諸行人。說陀羅尼呪。而擁護之。

深低帝屠蘇吒<sup>一</sup>阿若蜜帝烏都吒<sup>二</sup>深耆吒<sup>三</sup>波賴帝<sup>四</sup>耶  
彌若吒烏都吒<sup>五</sup>拘羅帝吒耆摩吒<sup>六</sup>沙婆訶

誦此呪五遍。取五色線。作呪索。痛處繫。

此呪乃是過去四十恒河沙諸佛所說。我今亦說。爲諸行人。作擁護故。除一切障礙故。除一切惡病痛故。成就一切諸善法故。遠離一切諸怖畏故。

佛告阿難。汝當深心清淨。受持此陀羅尼。廣宣流布於閻浮提。莫令斷絕。

此陀羅尼。能大利益三界衆生。一切患苦繫身者。以

此陀羅尼治之。無有不差者。

此大神呪。呪乾枯樹。尙得生枝。柯。華。果。何況有情。有識衆生。身有病患。治之不差者。必無是處。

善男子。此陀羅尼。威神之力。不可思議。不可思議。歎莫能盡。若不過去久遠已來廣種善根。乃至名字不可得聞。何況得見。汝等大衆。天。人。龍。神。聞我讚歎。皆應隨喜。

若有謗此呪者。即爲謗彼九十九億恒河沙諸佛。若於此陀羅尼。生疑不信者。當知其人。永失大利。百千萬

劫。常淪惡趣。無有出期。常不見佛。不聞法。不覩僧。

一切衆會菩薩摩訶薩。金剛密跡。梵。釋。四天。龍。鬼。神。聞佛如來讚歎此陀羅尼。皆悉歡喜。奉教修行。

**千手千眼觀世音菩薩廣大圓滿無礙大悲心陀羅尼經**